

Epistola P. Pauli Ragueneau ad R. P. Generalem
Vincentium Caraffam.

N OSTER ADMODUM REVERENDE IN CHRISTO PATER,
Pax Christi.

Superiore anno, nihil literarum accepimus ex Europa; imo ne Quebeco quidem responsum ad nos ullum est allatum, ad eas literas, quas scripseram, fuisse satis, de rerum nostrarum statu. Ut ante cæperat, ita nunc etiam pergit manus Domini nos tangere. Nec quærimur tamen, nec dicimus: *miseremini mei, saltem vos amici mei;* quia potius lætamur, et gaudemus semper, quia et nostro, omnium quotquot hîc sumus, et ecclesiæ nostræ bono, eveniunt mala, quibus permittit Deus nos probari, et quibus sane nos coronet potius, quam affligat.

Intellexit Paternitas vestra, posterioribus meis literis de pretiosâ morte, aut potius martyrio Patrum nostrorum; Patris Antonii Daniel, Patris Joannis de Brebeuf, et Patris Gabrielis Lallement; quos barbari Iroquæi, Ecclesiæ huic nascenti eripuerant crudeliter, cum grege christiano pastorem etiam mactantes, unumquemque omnibus suis invigilantem.

Sub finem exeuntis ejusdem anni 1649, duo alii Patres simili morte perfuncti sunt, in statione sua: Pater Carolus Garnier, vir apostolicus, vereque natus